

Pablo Colosacjārārē ojāca pūrī ni'i

A'ti pūrī a'tiro weero ojano'pā nise ni'i

Pablo Colosa, Frigia di'tapɯ nirī macācjārārē ojacɯ niwī. Cũ ne ni'cāti na tiropure wa'aticɯ niwī. Cũ me'rācjārā Jesucristo ye quetire were, cūrē ějōpeori curuacjārā sājācā weecārā niwā. Ti curua Colosacjārārē Epafras Jesucristo ye quetire bu'e, narē sɯ'ori niseticɯ niwī.

A'ti pūrīrē Pablo bu'iri da'reri wi'ipɯ nígũ, ojacɯ niwī.

A'tere ojacɯ niwī. Na añurō weesere tɯ'ogɯ, Ō'acūrē e'catise o'osere ojacɯ niwī. Tojo nicā mejēcā bu'eri masārē tɯ'omasīña nisere ojacɯ niwī. Apeyere, Jesucristo yere musā tɯ'o'caronojōta queoro weeya nisere ojacɯ niwī.

Pablo Colosacjārā Jesucristore ějōpeorārē oja'que ni'i

¹ Yɯ'ɯ marī acaweregɯ Timoteo me'rā musārē añuduti'i. Ō'acũ ɯa'caronojōta yɯ'ure Jesucristo cĩ ye quetire weredutigɯ cūwī.

² Musā Colosacjārā Jesucristo yarā cūrē ějōpeonu'cūrārē oja'a. Musārē Ō'acũ marī pacɯ añurō weeato. Ejerisājācā weeato.

Pablo Colosacjārārē Ō'acūrē sērībosa'que ni'i

³ Ō'acũ marī wiogɯ Jesucristo pacure musārē sērībosasetirinucũ e'catise o'o'o. ⁴⁻⁵ Musā ye

quetire tɬ'owɬ. A'tiro ni'i. Musã Jesucristo masãrẽ yu'ruomi nise diacjũ cjasere tɬ'ocãrã niwũ. Tere tɬ'orã, musãrẽ Õ'acũ ɬ'musepu weeatjere e'catiyutojacãrã niwũ. Tojo weerã Jesucristore añurõ ejõpeocãrã niwũ. Musã basu Õ'acũ yarã nipe'tirãrẽ añurõ ma'iseticãrã niwũ. Ƨsã tere tɬ'o'cãrã nitjãrã, Õ'acũrẽ e'catise o'o'o.

⁶ Ƨpẽrã quẽ'rã tojota te quetire tɬ'orã, musã weronojõta weerã weema. Nipe'tiropu wereturi-awã'cãrã weema. Musã Õ'acũ masãrẽ ma'isere tɬ'orã, “Diacjũta ni'i”, nicãrã niwũ. ⁷ Ƨsã ɬputu ma'igũ Epafras musãrẽ te quetire werecu niwĩ. Cũ Ƨsãrẽ da'ratamugũ nimi. Õ'acũ bese'cu Cristo ye cjasere musãrẽ weregu nimi. ⁸ Cũta musã ye quetire miiejawĩ. Musã Jesucristore ejõpeotjãrã añurõ ma'isetisere werewĩ.

⁹ Tojo weerã Epafras musã ye quetire wéréca numɬta maata Ƨsã Õ'acũrẽ sërĩbosanu'cãwũ. A'tiro nicã quẽ'rãrẽ musãrẽ tojo sërĩbosanu'cũcã'a. A'tiro sërĩbosa'a: “Õ'acũ, Espíritu Santu tɬ'omasĩse o'oato narẽ. Cũ tojo o'ocã, na mu'ɬ duti'quere añurõ tɬ'omasĩrãsama. ¹⁰ Mu'ɬ yarã weronojõta weesetirãsama”, ni sërĩbosa'a. Õ'acũ musã tojo weecã i'agũ, e'catigusami. Musã cũ ɬa'caronojõta añurõ weerãsa'a. Cũrẽ masĩnemorãsa'a. ¹¹ Cũ tutuayɬ'ruagu cũ tutuasere musãrẽ o'ogusami. Tojo weecã, musã e'catise me'rã nipe'tise mejẽcã wa'asere wãcũtutuarãsa'a. ¹² Musã Õ'acũrẽ e'catise o'orãsa'a. Cũ musã ña'arõ wee'quere duporopu acobojo, ducayutojacu niwĩ. Tojo weerã musã

cũ tiropu ãpẽrã cũ yarã, cũrẽ ejõpeorã me'rã nirãsa'a. ¹³⁻¹⁴ Marĩ pacu Õ'acũ marĩrẽ, wãtĩ dutino'cãrãrẽ yu'rũocu niwĩ. Õ'acũ macũ wẽrĩse me'rã na'itĩ'arõpu weronojõ ní'cãrãrẽ yu'rũocu niwĩ. Marĩ ña'ase wee'quere acobojocu niwĩ. Tojo weegu marĩrẽ cũ macũ uputu maigũrẽ o'ócu niwĩ. Marĩ wiogu niato nígu tojo weecu niwĩ.

Õ'acũ Jesucristo wẽrĩse me'rã masãrẽ yu'rũo'que ni'i

¹⁵ Õ'acũrẽ ĩ'ano'ña marĩ'i. Cũ macũ a'ti nucũcãpu a'tigu, cũ nisetisere masãrẽ bajuy-oropu ĩ'ocu niwĩ. Jesucristo nipe'tise duporo nitojacu niwĩ. ¹⁶ Õ'acũ cũ macũ me'rã nipe'tisere u'muse, a'ti di'ta bajurã, bajutirãrẽ weecu niwĩ. Apeye quẽ'rãrẽ bajuse, bajutisere weecu niwĩ. Tojo nicã wiorãrẽ u'musepu nirã, a'ti nucũcãpu nirã, nipe'tirãrẽ weecu niwĩ. Tere wéegu, “Yu'u macũ ye nirõsa'a”, nicu niwĩ. ¹⁷ Cũ macũ ne waroputa nipe'tise cũ bajurẽse duporo nitojacu niwĩ. Cũ me'rãta cũ bajurẽ'que ninu'cũcã'a. Queoro ducayuro marĩrõ ninu'cũ'u. ¹⁸ Jesucristo marĩ dupoá cũrẽ ejõpeorã wiogu nimi. Cũta marĩ cũrẽ ejõpeorãrẽ catise o'ogu nimi. Marĩ nipe'tirã Jesucristore ejõpeorã ni'cã curua, ni'cã upu ni'i. Cũ marĩ masã ma'mi nimi. Cũ wẽrĩca be'ro marĩ nipe'tirã duporo masãcu niwĩ. Tojo weegu nipe'tirã bu'ipu nimi. ¹⁹ Õ'acũ a'tiro nicu niwĩ: “Yu'u macũ yu'u weronojõta niato”, nicu niwĩ. Tojo weero nipe'tise Õ'acũ nisetise Jesucristopureta ni'i. ²⁰ Õ'acũ cũ macũrẽ wẽrĩcã

uacu niwĩ. Nipe'tise, nipe'tirã, u'muse, a'ti nucũcã yu'u me'rã apoato nígu tojo weecu niwĩ. Cũ macũ curusapu wẽrise me'rã apocu niwĩ.

²¹ Musã quẽ'rã ne waro Õ'acũrẽ masĩticãrã niwũ. Musã ña'arõ weeseti'que bu'iri Õ'acũrẽ ĩ'atu'ti, ña'arõ wãcũcãrã niwũ. ²² Musã tojo nise-timicã, Õ'acũ ni'cãrõacãrẽ musã me'rã apocu niwĩ. Jesucristo marĩ weronojõ uputigu ti upu me'rãta cũ pi'eti, wẽricu niwĩ. Cũ wẽrise me'rã Õ'acũ yarã bu'iri marĩrã tojacã weecu niwĩ. Cũ pacupure musãrẽ wiaguti nígu, tojo weecu niwĩ.

²³ Musã cũ ye quetire ějõpeonu'cũcã, cũ uaro weenu'cũcã, tojo weegusami. Āpẽrã musãrẽ mejẽcã werecã, cũ ye quetire ne cõ'aticã'ña. A'tere nipe'tirocãrãpu tu'orã weema. Yu'u quẽ'rã a'te quetire weretamusijaguta ni'i.

Õ'acũ Pablоре Jesucristore ějõpeorãrẽ weeta-muduti'que ni'i

²⁴ Õ'acũ yu'ure wereduti'quere weregu, apetero pũrõ pi'eti'i. Tojo pi'etinigũ, e'cati'i. Jesucristo cũrẽ ějõpeorã ye niatjere pi'etitojacu niwĩ. Tojo weegu yu'u quẽ'rã cũrẽ ějõpeorãrẽ weetamusĩ'rĩgu pi'eti'i. ²⁵ Õ'acũ yu'ure narẽ weetamudutiwĩ. Tojo weegu yu'u musã Jesucristore ějõpeorãrẽ a'tiro wee'e. Cũ ye quetire añurõ tu'omasĩpe'oato nígu musãrẽ weetamu'u. ²⁶⁻²⁷ Musã Colosacãrã, judío masã nitirã quẽ'rãrẽ añubutiase queti ni'i. Jesucristo masãpũreta nimi. Cũ musã me'rã niyucã, añuse musã u'musepu niatjere masĩ, e'cati'yutojasa'a. Õ'acũ maata judío masã nitirãrẽ Jesucristo

yũ'ruogusami nisere wereticũ niwĩ. Tojo weerã ne warocjãrãpua a'tere masĩticãrã niwã. A'tocaterore Õ'acũ Jesucristore ějõpeorãrẽ masĩcã weemi.

²⁸ Æsã Jesucristo ye quetire were'e. Nipe'tirã masãnucũrẽ cũ nisetisere masĩdutirã were'e. Cũ uaro weedutirã, cũ me'rã ninu'cũdutirã were'e. ²⁹ A'tere weesĩ'rĩgũ, Jesucristo cũ tutuase o'ose me'rã yũ'u masãrẽ uputu bu'e, narẽ Õ'acũrẽ sẽrĩbosa'a.

2

¹ Yũ'u ní'caronojõta musã ye niatjere uputu wãcũ, Õ'acũrẽ sẽrĩbosa'a. Tojo weegu musãrẽ a'tere masĩato nĩgũ ojao'ogu wee'e. Nipe'tirã Laodiceacjãrãrẽ, tojo nicã yũ'ure ĩ'atirãrẽ mejãrõta sẽrĩbosa'a. ² A'tiro sẽrĩ'i: "Õ'acũ, narẽ wãcũtutuase o'oya. Añurõ su'ori nisetiatio. A'merĩ ma'iatio. Na añurõ mu'u ye cjasere tu'omasĩpe'oato. Na tojo wéérã, mu'u macũrẽ añurõ masĩrãsama", ni sẽrĩbosa'a. Ne waropure Õ'acũ nipe'tise cũ macũ Jesucristo ye cjasere wereticũ niwĩ. A'tocaterore majã cũ yere weremi. ³ A'tiro ni'i. Jesucristopureta nipe'tise masĩse, tu'omasĩse ni'i. Tojo weegu cũ dia'cũ añurõ masĩgũ nimi. Cũrẽ ějõpeorã nipe'tise masĩsere bocano'o. ⁴ Æpẽrã musãrẽ diacjũ weronojõ ucũmaasobosama. Añurõ tu'omasĩña nĩgũ, tere were'e. ⁵ Yũ'u aperopu nimigũ, musã wa'teropu nĩgũ weronojõ tu'oña'a. Musãrẽ pũrõ wãcũ'u. Yũ'u musã añurõ nisetica tu'ogu, musã Jesucristore ějõpeocã tu'ogu, uputu e'cati'i.

⁶ Ne waropure marĩ wiogu Jesucristore ĕjõpeocārā niwũ. Titapure musā ĕjõpeo'caronojõta a'tiro nicā quē'rārē nipe'tise numurĩ cūrē ĕjõpeonu'cũcā'ña. ⁷ Cūrē nemorõ masĩnemoña. Musārē bu'e'caronojõta cūrē ĕjõpeonemoña. Umucorinacũ Ō'acūrē “Añu'u”, ni e'catise o'oya.

Jesucristore ĕjõpeotirā ĕjõpeo'que ni'i

⁸ Āpērā musārē werecā, añurõ tu'omasĩña. Na musārē nisoose me'rā werebosama. Diacjũ weronojõ ucūsama. Niwe'e. Te ucūse me'rā masārē were, maasoorā weema. Jesucristo ye mejēta ni'i. Na basu na wācūsere, duporocjārāpu nisetimujātiquere wererā weema. Tojo weerā narē ĕjõpeoticā'ña.

⁹ A'tiro pe'e ni'i. Jesucristopure nipe'tise Ō'acũ nisetise ni'i. ¹⁰ Musā quē'rā cūpureta ni'i. Tojo weerā musā Ō'acūrē cuoyu'ruatoja'a. Jesucristo nipe'tirā wiogu nimi. U'musecjārā, a'ti turicjārā, bajurā, bajutirā nipe'tirā wiorā cū doca nima.

¹¹ Musā masĩsa'a, Ō'acũ yarā sājāsĩ'rĩrā, judío masā weronojõ ō'rēcju yapa caserore yejecō'aticārā niwũ. A'tiro pe'e wa'acaro niwũ. Jesucristo basu musā ña'arõ weesetisere cō'acu niwĩ. Tojo weerā ō'rēcju yapa caserore yejecō'a'cārā weronojõ Ō'acũ yarā tojacārā niwũ. ¹² Jesucristo wēĩ yaano'cu niwĩ. Musā quē'rā wāmeyeno'rā, ña'arõ weeseti'quere du'urā, wēĩ yaano'cārā weronojõ tojacārā niwũ. Wēĩ'cārā, catirā na wee'quere weetimimaba. Tojo weerā musā quē'rā toduporopu wee'quere

weetisa'a. Jesucristo wẽrĩca be'ro Õ'acũ cãrẽ masõcũ niwĩ. Cãrẽ masõ'caronojõta musã quẽ'rãrẽ masõgũ, apesu'tiro sãjãcã weecu niwĩ. Õ'acũ cũ tutuaro me'rã cũ macũ Jesucristore masõ'quere musã ejõpeoyucã, tojo weecu niwĩ. ¹³ Musã judío masã nitirã õ'rẽcju yapa caserore yejecõ'aticãrã niwũ. Tojo nicã ña'arõ weecũcãrã niwũ. Ña'arõ nisetitjãrã, toduporopure wẽrĩ'cãrã weronojõ nicãrã niwũ. A'tocaterore majã Õ'acũ yarã ni'i. Cũ musãrẽ catinu'cũcã weecu niwĩ. Musãrẽ ña'arõ wee'quere acobojocu niwĩ. ¹⁴ Õ'acũ cũ duti'quere yu'rũnu'cãcã, marĩrẽ bu'iri da'rebopĩ. Te marĩ peje ña'ase cuomi'quere cũ macũ curusapũ wẽrĩse me'rã acobojocu niwĩ. ¹⁵ Jesucristo cũ wẽrĩse me'rã nipe'tirã ï'orõpũ wãtiarẽ docaque'acã weecu niwĩ.

“A'ti nucũcã cjasere pũrõ wãcũticã'ña” ní'que ni'i

¹⁶ Musã masĩsa'a, judío masã ni'cãrẽ ap-eye ba'asere ba'adutitisama. Tojo weerã ãpẽrã musã sĩ'rĩsere, ba'asetisere judío masãrẽ dutítisennojõrẽ na ucjacã, tu'oticã'ña. Na peje bosenũmũrĩ cuosama. Ni'cã cũ'marẽ, ma'ma mujĩpũrẽ, tojo nicã semanarĩnucũ na soowuase nũmũrĩrẽ cuosama. Na weronojõta ticuse bosenũmũrĩ weedutisama. “Musã tojo weetirã, Õ'acũ duti'quere weewe'e”, nisama. Na tojo nicã, tu'oticã'ña. ¹⁷ Õ'acũ tere ne waropure Jesucristore queose o'oyugu weecu niwĩ. Yu'u macũ ye cjasere masĩato nígũ tojo weecu niwĩ. Ni'cãrõacãrẽ Jesucristo a'titojacũ niwĩ. Tojo

weegu masārē a'tere toduporopu duti'quere
Ō'acū sō'owaro weedutitimi majā.

18 Āpērā musārē a'tiro nisoobosama: “Ūsā
añurā ni'i. Ō'acū ūsārē añurō wācūato nírā be'ti
ñubue'e. Ō'acūrē wereco'terārē ñubuepeo'o.
Ūsā cārītimirā quē'ese weronojō Ō'acū yere
ī'a'a. Tojo wéerā, ūsā āpērā yu'rūoro Ō'acū
ye cjasere añurō masī'i. Musā quē'rā tojota
weeya. Musā a'tere weetirā, bu'iri cuorāsa'a”,
nibosama. Musārē tojo nicā, ne ējōpeoticā'ña.
“Masīrā waro ni'i ūsā”, ni wācūsama. Tojo
nima'acārā weema. A'te masā wācūse dia'cū
ni'i. 19 Na Jesucristore sirututima. Marī pūrīcā
Jesucristo ya curuacjārā ni'i. Cūta nimi marī
dupoá. Marīrē cū masīsere, tutuasere o'osami.
Te me'rā marī umucorinucū Ō'acū uaronojō
nemorō a'merī ma'i, weetamumasī'i.

20 Musārē toduporopure musā ñecūsūma
nisetimujāti'quere peje dutise nicaro niwū.
A'tocaterore toduporopu weeseti'quere
Jesucristo cū wērīse me'rā yu'rūweticā weecu
niwī. Yu'rūwetica be'ro nimicā, ¿de'ro weerā
musā toduporopu weeseti'caronojōta niti
tja? 21 Musārē āpērā “A'tenojōrē ñe'eticā'ña,
tenojōrē ba'aticā'ña”, nibosama. 22 Na tojo nírā,
a'ti turi cjase maata pe'tisere ucūrā weema.
Masā na wācūrō me'rā weedutise ni'i. 23 Na
dutise añubutiasere weronojō busu'u. Bu'icjase
dia'cū a'tiro nita'sasama: “Musā quē'rā ūsā
weronojōta añurō ējōpeoroua'a. Ō'acū marīrē
añurō wācūato nírā be'tirowa'a. Marī upu
quē'rā ña'a nisa'a. Tojo weerā marī basu marī

upure pi'etise o'oroua'a. Marĩ pi'etise o'óca be'ro marĩ ña'arõ ɰaripejasere cõ'ata basio'o", nimisama. Niwe'e. Na dutisere weérã, marĩ mejârõta tojacã'sa'a tja.

3

¹⁻³ Yɰ'u musãrẽ toduporopɰ ní'caronojõta Jesucristo wẽrĩcɰ niwĩ. Musã cũ wẽrĩse me'rã toduporopɰ weeseti'quere du'ucârã niwũ. Cũrẽ cũ tutuase me'rã cũ pacɰ masõcɰ niwĩ. Musã quẽ'rãrẽ cũ macũrẽ ẽjõpeoyucã, cũ tutuase me'rã musãrẽ catinu'cũcã weecɰ niwĩ. Tojo weerã a'ti turi cjasere wãcũticã'ña. Ƴ'muse cjase pe'ere wãcũña.

Musã Õ'acũpure Jesucristo me'rã ni'i. Jesucristo ɰ'musepɰ Õ'acũ me'rã wiogɰ dujiri cūmurõpɰ nimi. Tojo weerã musã Jesucristo nirõ ɰ'musepɰ cjasere añurõ wãcūnũrãña. ⁴ Cũta marĩrẽ sũ'ori nimi. Sũ'ori catimi. Marĩ cũ me'rã ni'i. Tojo weerã cũ a'ti nucũcãpure apaturi a'ticã, marĩ quẽ'rã cũ tutuase, cũ asistese me'rã a'tirãsa'a.

Duporopɰ weeseti'quere Pablo du'uduti'que ni'i

⁵ Musã a'ti turi cjase ña'ase weesĩ'rĩsere du'ucã'ña. Musã, musã nũmosãnumia nitirãrẽ a'metãrãticã'ña. Musã numia quẽ'rã, musã marãpusũmua nitirãrẽ a'metãrãticã'ña. Ne ãpẽrã me'rã “Ña'arõ weesĩ'rĩsa'a”, niticã'ña. Ne ãpẽrãrẽ musã wãcũsepɰ “Narẽ wuacãjĩ, na me'rã nisĩ'rĩsa'a”, ni wãcũticã'ña. ãpẽrã na cɰosere ɰoticã'ña. Musã apeyenojõrẽ ɰorã, Õ'acũ mejẽtare ẽjõpeorã weebosa'a. ⁶ Cũrẽ

yu'runu'câcã, a'tenojõ weerãrẽ Õ'acũ uputu bu'iri da'regusami. ⁷ Musã toduporopure tere weesetirã, ña'arã nicãrã niwũ. ⁸ A'tocaterore majã nipe'tisere musã ña'arõ weesere, uase, ï'atu'tise, âpêrãrẽ nitu'ti yabisere du'uya. Ña'asere ne wãcũ bujicã'ticã'ña. ⁹ Âpêrãrẽ nisooticã'ña. Musã toduporopu weeseti'quere du'utojacãrã niwũ. Tojo weerã tere weeticã'ña majã. ¹⁰ A'tocaterore musã apeye wãcũse cu'o. Õ'acũ musãrẽ wee'cu cũ weronojõ nisetiatio nígũ musãrẽ ducayunu'cũgũ weemi. Nemorõ cãrẽ masiatio nígũ tojo weemi. ¹¹ Marĩ nipe'tirãrẽ Jesucristo ï'orõpore ne ducawatise mar'i. Judío masã, judío masã nitirã, âpêrã õ'rêcju yapa casero yejecõ'ano'cãrã, yejecõ'ano'ña marĩrãrẽ ducawatise mar'i. Tojo nicã apesecjãrãpu, sumutoricjãrã, da'raco'teri masã, da'raco'tetiri masã, ã'rã nipe'tirã me'rã ducawatise mar'i. Cũ nipe'tirã cãrẽ ejõpeorã wiogu nimi. Nipe'tirãpore nimi.

¹² Õ'acũ musãrẽ ma'imi. Cũ musãrẽ cũ yarã niatio nígũ besecu niwĩ. Tojo weerã âpêrãrẽ pajaña'ña. Narẽ añurõ e'catise me'rã weetamuña. Musã “Âpêrã yu'rũoro ni'i”, ni wãcũticã'ña. Musãrẽ mejêcã nicã, tojo tu'oña'ña. Wãcũtutuaya. ¹³ Musã basu âpêrã me'rã a'metu'ti'cãrã, âpêrã mejêcã weecã tu'sati'quere narẽ acobojoya. Jesucristo musãrẽ acobojocu niwĩ. Tojo weerã musã quẽ'rã âpêrãrẽ mejãrõta acobojoya. ¹⁴ A'merĩ ma'ĩa. Musã tojo ma'irã, nipe'tise yu'u duti'quere weepe'ocã'rãsa'a. Añurõ musã basu su'ori nise-

tirāsa'a. ¹⁵ Ō'acũ cũ ɰaro weecã, musã ye ejeripõ'rãrĩpure e'caticã weesami. Cũ ɰaro wee-tirã, bujawetisa'a. Tojo weerã cũ ɰaro weeya. Añurõ sũ'ori nisetiya. A'tere ɰasãgũ, cũ musãrẽ ni'cã curua, ni'cũ põ'rã weecu niwĩ. Musã cũrẽ e'catise o'onu'cũcã'ña.

¹⁶ Jesucristo ye quetire añurõ wãcũnũrũña. Cũ masĩse o'ose me'rã ãpẽrãrẽ musã basu a'merĩ bu'eya. Musã ejeripõ'rãrĩpu Ō'acũrẽ e'catise o'orã, basapeoya. ¹⁷ Musã Jesucristo yarã ni'i. Tojo weerã nipe'tise musã weesetise, ucũsetisere cũ yarã weronojõta weeya. Jesucristo cũ tutuase me'rã tere weeta basio'o. Cũ pacũre e'catise o'onu'cũcã'ña.

Jesucristore ějõpeorãrẽ weeduti'que ni'i

¹⁸ Marãputirãnumia, Jesucristo marĩ wiogũre ějõpeorã, a'tiro weeya. Musã marãpusũmũarẽ na dutisere yũ'ti ějõpeoya. ¹⁹ Musã numotirãumua pe'e, musã numosãnumiarẽ ma'ĩña. Na me'rã uaticã'ña. ²⁰ Wĩ'marã, ma'mapjia, nipe'tise musã pacũsumua dutisere añurõ yũ'tiya. Ō'acũ tojo weecã ɰasami. ²¹ Musã põ'rãrẽ na'irõ tu'ti, uacã weeticã'ña. Musã tojo weecã, na bujaweti, musã dutisere weemasĩtisama.

²² Da'raco'teri masã, nipe'tise musã wiorã a'ti nucũcãcjãrã na dutisere yũ'tiya. Na ĩ'orõpure, na ĩ'atiropure añurõ da'raya. Musã wiorã ĩ'orõpu dia'cũ añurõ da'rãrã, musã wiogu “Añurõ da'rama” ni wãcũato, nirã weebosa'a. Musã tojo weeticã'ña. Ō'acũrẽ añurõ ějõpeotjĩarã, weesooro marĩrõ da'raya. ²³ Musã

apeyenojō da'rarā, añurō tu'sase me'rā da'raya. Teese me'rā weeticā'ña. Masārē da'rabosamirā, Jesucristore da'rabosarā weronojō tu'oña'ña.

²⁴ Musā cūrē da'raco'terā ni'i. Cūta musārē u'musepu wapayegusami. Musā tere masitoja'a. Tojo weerā añurō da'raya. ²⁵ Ña'arō wee'que wapare Õ'acū bu'iri da'regusami. Masā nipe'tirārē ni'cārōnojō bu'iri da'resami. Ne ni'cū yu'rūwetitisami.

4

¹ Dutiri masā, musā quē'rā u'musepure ni'cū wiogu cuo'o. Musā tere masitoja'a. Tojo weerā Õ'acū uaronojōta musārē da'raco'terārē añurō cuoya.

² Õ'acūrē añurō tu'ocasanu'cōtjārā, sērīnu'cūcā'ña. Cūrē “Añu'u”, ni e'catise o'oya. ³ Musā Õ'acūrē sērīrā, ũsā quē'rārē sērībosaya. “Pājārā Jesucristo ye quetire masītirārē tu'osī'rīcā weeato”, ni sērībosaya. Cū ye queti daporocjārāpu na masīno'ña marī'que añuse queti ni'i. A'te werese ye bu'irita yu'u bu'iri da'reri wi'ipu dujisa'a. ⁴ Yu'ure Õ'acūrē sērībosaya. Yu'ure “Wisiro marīrō diacjū wereato”, ni sērībosaya.

⁵ Āpērā Jesucristore ējōpeotirā me'rā añurō nisetiya. Na me'rā musā weesetisetirinacū Õ'acū uaronojōta narē añurō weeya. ⁶ Na me'rā ucūrā, añurō tu'saroputa tu'otu'sase me'rā ucūña. Āpērā musārē sērītiña'cā, añurō diacjū yu'tiya.

Pablo me'rācjārā añudutise o'o'que ni'i

7 Tíquico yu'u me'rãcjũ yu'u ma'igũ a'tiro weegusami. Yé quetire musãrẽ weregu wa'agusami. Cũ yu'u me'rã marĩ wiogu Jesucristo yere da'raco'tetamugũ nimi. Tojo nicã yu'ure bu'etamugũ nimi. 8 Yu'u cãrẽ musã tiropu wa'adutiguti wee'e. Æsã ye quetire tu'orã, musã wãcũtutua, e'catinemorãsa'a. 9 Onésimo musã ya macã nícũ'cu quẽ'rã cũ me'rã wa'agusami. Cũ yu'u ma'igũ, yu'u me'rãcjũ a'tocaterore ãsãrẽ añurõ weetamugũ weemi. Na puarã musãrẽ wererãsama nipe'tise a'to Romapu de'ro wa'a'quere.

10 Aristarco musãrẽ añudutimi. Cũ quẽ'rã yu'u me'rã bu'iri da'reri wi'ipu nimi. Marco, Bernabé basucu quẽ'rã musãrẽ añudutimi. Marco musã tiropu sijacã, yu'u musãrẽ toduporo ní'caronojõta añurõ ñe'eapa. 11 Apĩ Jesú na “Justo” pisuno'gũ musãrẽ añudutimi. Ærã i'tiarã ãpẽrã judío masã Jesucristore ejõpeorã wa'terore na dia'cũ yu'ure da'ratamuma. Na Õ'acũ wiogu nisere masãrẽ bu'erã weema. Na weetamuse me'rã yu'u wãcũtutua, e'catise cu'o'o. 12 Epafras musã me'rãcjũ añudutimi. Cũ Jesucristo ye cjasere da'raco'tegu nimi. Cũ musãrẽ uputu sërĩbosagu weemi. Õ'acũrẽ añurõ sirutuato, cũ uaro añurõ weenu'cũato nígũ, tojo sërĩbosami. 13 Yu'u diacjũta were'e. Cũ musãrẽ uputu sërĩbosacã ï'a'a. Æpẽrã quẽ'rãrẽ Laodiceacjãrãrẽ, tojo nicã Hierápolicjãrãrẽ sërĩbosami. 14 Luca ocoyeri masũ ãsã uputu ma'igũ musãrẽ añudutimi. Apĩ quẽ'rã Demas wãmetigu añudutise o'omi.

Pablo añudutituo'que ni'i

¹⁵ Laodiceacjãrã Jesucristore ëjõpeorã añuato. Ninfã wãmetigo quẽ'rã añuato. Tojo nicã nipe'tirã co ya wi'ipũ Õ'acũrẽ ëjõpeorã nerẽwuarã añuato.

¹⁶ Musã a'ti pũrĩrẽ bu'epe'oca be'ro Laodiceacjãrãpũre o'óya. Na quẽ'rã na nerẽwuaropũ bu'eĩ'oato. Musã quẽ'rã ape pũrĩ Laodiceacjãrãrẽ yũ'u ojáca pũrĩrẽ ñe'erã, musã nerẽrõpũ bu'eya. ¹⁷ A'tiro niña Arquipore: “Marĩ wiogũ da'radutigũ cũu'quere añurõ da'ratu'ajaya.”

¹⁸ A'te nituose darire musãrẽ añudutise o'ogũ, yũ'u basuta oja'a. Wãcũña yũ'u bu'iri da'reri wi'ipũ nisere. Õ'acũrẽ sërĩbosaya. Õ'acũ musãrẽ añurõ weeato.

Tocã'rõta oja'a.

Pablo

Õ'âkã hi yeere uúkũri turi Tukano

New Testament in Tucano (BR:tuo:Tucano)

copyright © 2009 Wycliffe Bible Translators, Inc.

Language: Tucano

Translation by: Wycliffe Bible Translators, Inc.

Tucano [tuo], Brazil

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Tucano

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-12-01

PDF generated using Haiola and XeLaTeX on 11 Nov 2022 from source
files dated 9 Oct 2020
00ebd04f-7b0d-5a72-9407-eb53ae2bd086